

Hō 上帝歡喜 ê 目標

我 án-ne 講，kám 是想 beh 得 tiòh 人 ê o-ló? M̄是，是 beh 得 tiòh 上帝 ê o-ló；我 kám teh 求 hō 人歡喜？我若 iáu-koh ài hō 人歡喜，我就 m̄是基督 ê 奴僕。

(《全民台語聖經》加拉太書 1：10)

我以前是一個政治家，我 chit-má m̄是 ā。當我 teh 競選喬治亞州參議員 ê 時，有七萬五千人 tòà tī 我 ê 第十四選區，當我出去參加競選活動 ê 時，我想 beh hō in 歡喜。以後我去到亞特蘭大，我甚至 koh khah 想 beh hō in 歡喜。

有一工，我決定 beh 參選州長，所以，我開始 m̄-nā 想 beh hō hiah-ê 七萬五千人歡喜，koh beh hō 全喬治亞 (Georgia) 州 ê 人歡喜。

後來我競選總統，所以我 tòh 想 beh hō 所有 ê 美國公民歡喜。

我懷疑保羅會成做一個好 ê 政治家。實際上伊寫講：「我無 beh 寫 phoe 來 hō 人歡喜；我 m̄是想 beh 巴結任何人；我 m̄是 kan-taⁿ 為 tiòh beh 交朋友 chiah tī 羅馬四界旅行；我無 beh 為 tiòh 偉大傳道人，á 是偉大作家 ê 聲望來做工。我旅行、演講 kah 寫 phoe 只有一個理由：Hō 上帝歡喜。」

當咱讀 tiòh 保羅 ê 話，咱真容易 tòh 了解，伊認為啥物是咱應該 phah 拚做工來 hō 伊歡喜 ê；這當然 m̄是 tī 咱四 kho 圍 ê 人。咱大部分 ê 人，包括我，lóng 有 teh 想 beh hō 其他 ê 人歡喜，m̄-koh，保羅講：「我 m̄是 án-ne。」

這 m̄是講咱 tòh 應該試看用 pháiⁿ 行為來激怒人，koh kā in 虐待。Tú-tú 是倒 péng！總是，保羅清楚表明，咱若設定「hō 人歡喜」做主要 ê 目標，

咱會惹來麻煩；tòh 是講 he m̄是咱 tī 生活中應該追求 ê。

咱顛倒 tiòh kā 咱 ê 目標設定做：盡量效法耶穌基督 ê 言行。Tú 照保羅所講：「我所有想 beh 做 ê tòh 是：Hō 上帝歡喜。」

祈禱：上主 ah，當我奉基督 ê 名服事人 ê 時，求祢幫助我永遠 bē kā hō in 歡喜成做我主要 ê 考慮，因為這有可能致使我變成「最低公分母(編按：意思是指分享利益 ê 人中間 siōng 差 ê 人)」。求祢賜我 khah 高級 koh khah 有效 ê 目標來 hō 祢歡喜，無論 he 是啥物意思，無論我人是 tī tó 位。求祢幫助我活出符合耶穌 ê 生活 kah 話語，以及祂 ê 教導 kah 典範 ê 人生。我奉祂 ê 名懇求。阿們。

(2005.05.01)